

羅家倫
主編
中華民國史料叢編

臨時公報

中國國民黨
中央委員會
黨史史料編纂委員會印行

辛亥年十二月二十六日 星期二

臨時公報

發行所

北京東長安牌樓王府井大街
電話東局二百零一號

大清皇帝宣統三年十二月十六日

旨一道

奉

旨朕欽奉

隆裕皇太后懿旨前據岑春煊袁樹勛等贊出使大臣陸徵祥等統兵大員段祺瑞等電請速定共和國體以免生靈荼炭等語現在時局阨危四民失業朝廷亦何忍因一姓之尊榮貽萬民以實禍惟是

宗廟

陵寢關係重要以及

皇室之優禮皇族之安全八旗之生計蒙古回藏之待遇均應預爲籌畫著授袁世凱以全權研究一切辦法先行迅速與民軍商酌條件奏明請旨欽此

宣統三年十二月十六日

內閣總理大臣袁世凱署名

大清皇帝宣統三年十二月二十五日

旨三道 并條件

奉

十二月二十六日

旨朕欽奉

隆裕皇太后懿旨前因民軍起事各省響應九夏沸騰生靈塗炭特命袁世凱遺員與民軍代表討論大局議開國會公決政體兩月以來尙無確當辦法南北睽隔彼此相持商輟於途士露於野徒以國體一日不決故民生一日不安今全國人民心理多傾向共和南中各省既倡議於前北方諸將亦主張於後人心所嚮天命可知予亦何忍因一姓之尊榮拂兆民之好惡是用外觀大勢內審輿情特率皇帝將統治權公諸全國定爲共和立憲國體近慰海內厭亂望治之心遠協古聖天下爲公之義袁世凱前經資政院選舉爲總理大臣當茲新舊代謝之際宜有南北統一之方卽由袁世凱以全權組織臨時共和政府與民軍協商統一辦法總期人民安堵海宇乂安仍台滿漢蒙回藏五族完全領土爲一大中華民國予與皇帝得以退處寬閑優游歲月長受國民之優禮親見郅治之告成豈不懿歟欽此

宣統三年十二月二十五日

蓋用

御寶

內閣總理大臣袁世凱署外務大臣胡惟德民政大臣趙秉鈞署度支大臣紹英
學務大臣唐景崇假陸軍大臣王士珍假署海軍大臣譚學衡司法大臣沈家本假
署農工商大臣熙彥署郵傳大臣梁士詒理藩大臣達壽署名

奉

旨朕欽奉

隆裕皇太后懿旨前以大局阡危兆民困苦特飭內閣與民軍商酌優待皇室各條件以期和

平解決茲據覆奏民軍所開優禮條件於

宗廟

陵寢永遠奉祀

先皇陵制如舊安修各節均已一律擔承皇帝但卸政權不廢尊號並議定優待皇室八條待遇皇族四條待遇滿蒙回藏七條覽奏尙爲周至特行宣示皇族暨滿蒙回藏人等此後務當化除畛域共保治安重視世界之昇平胥享共和之幸福予實有厚望焉欽此

宣統三年十二月二十五日

蓋用

御寶

內閣總理大臣袁世凱署外務大臣胡惟德民政大臣趙秉鈞署度支大臣紹英
學務大臣唐景崇假陸軍大臣王士珍假署海軍大臣譚學衡司法大臣沈家本假
署農工商大臣熙彥署郵傳大臣梁士詒理藩大臣達壽署名
甲關於

大清皇帝辭位之後優待之條件

今因

大清皇帝宣布贊成共和國體中華民國於

大清皇帝辭退之後優待條件如左

第一款

大清皇帝辭位之後尊號仍存不廢中華民國以待各外國君主之禮相待

十二月二十六日

第二款

大清皇帝辭位之後歲用四百萬兩俟改鑄新幣後改爲四百萬圓此款由中華民國撥用

第三款

大清皇帝辭位之後暫居

宮禁日後移居頤和園侍衛人等照常留用

第四款

大清皇帝辭位之後其

宗廟

陵寢永遠奉祀由中華民國酌設衛兵妥慎保護

第五款

德宗崇陵未完工程如制安修其奉

安典禮仍如舊制所有實用經費均由中華民國支出

第六款

以前

宮內所用各項執事人員可照常留用惟以後不得再招闖人

第七款

大清皇帝辭位之後其原有之私產由中華民國特別保護

第八款

原有之禁衛軍歸中華民國陸軍部編制額數俸餉仍如其舊

乙關於清皇族待遇之條件

一清王公世爵概仍其舊

二清皇族對於中華民國國家之公權及私權與國民同等

三清皇族私產一體保護

四清皇族免當兵之義務

丙關於滿蒙回藏各族待遇之條件

今因滿蒙回藏各民族贊同共和中華民國所以待遇者如左

一與漢人平等

二保護其原有之私產

三王公世爵概仍其舊

四王公中有生計過艱者設法代籌生計

五先籌八旗生計於未籌定之前八旗兵弁俸餉仍舊支放

六從前營業居住等限制一律蠲除各州縣聽其自由入籍

七滿蒙回藏原有之宗教聽其自由信仰

十二月二十六日

以上條件列於正式公文由兩方代表照會各國駐北京公使轉達各該政府

奉

旨朕欽奉

隆裕皇太后懿旨古之君天下者重在保全民命不忍以養人者害人者現在新定國體無非欲先弭大亂期保乂安若拂逆多數之民心重啟無窮之戰禍則大局決裂殘殺相尋勢必演成種族之慘痛將至

九廟震驚兆民荼毒後禍何忍復言兩害相形惟取其輕此正朝廷審時觀變痼癥吾民之苦衷凡爾京外臣民務當善體此意爲全局熟權利害勿得挾虛矯之意氣逞偏激之空言致國與民兩受其禍著民政部步軍統領姜桂題馮國璋等嚴密防範剴切開導俾皆曉然於朝廷應天順人大公無私之意至國家設官分職以爲民極內列閣府部院外建督撫司道所以康保羣黎非爲一人一家而設爾京外大小各官均宜慨念時艱慎供職守應卽責成各長官敦切誠勸毋曠厥官用副予夙昔愛撫庶民之至意欽此

宣統三年十二月二十五日

肅用

御寶

內閣總理大臣袁世凱署外務大臣胡惟德民政大臣趙秉鈞署度支大臣紹英
學務大臣唐景崇署陸軍大臣王士珍署海軍大臣譚學衡司法大臣沈家本
署農工商大臣熙彥署郵傳大臣梁士詒理藩大臣達壽署名

辛亥年十二月二十七日 星期三

臨時公報

發行所

北京東長安牌樓王府井大街
電話東局二百零一號

目錄

通告

照會

通 告

全權組織臨時共和政府袁 布告內外大小文武官衙 十二月二十六日

現在共和國體業經宣布世凱忝膺組織臨時政府之任力小荷重深懼弗勝竊念政府機關不容有一日之間斷現值組織臨時政府所有舊日政務目下仍當繼續進行庶政方新百端待舉全賴羣策羣力互相匡濟務以保全治安共維大局爲要著在新官制未定以前凡現有內外大小文武各項官署人員均應照舊供職毋曠厥官所有各官署應行之公務應司之職掌以及公款公物均應照常辦理切實保管不容稍懈倘有借端規避曠厥職守者不獨違背官規抑且放棄國民義務竊願在官諸君子共凜此意此令

全權組織臨時共和政府袁 布告軍警 十二月二十六日

現在共和國體業經宣布本政府組織伊始地方治安關係至重全賴軍警協同維護免使居民驚擾現軍警各界贊成共和早經聯合一致尤應各盡義務合力維持所有舊定之軍紀警章仍當繼續施行藉以統一政權保持秩序倘有不逞之徒藉端生事擾亂治安者定當按法懲治以維大局凡各級長官務當共申此情認真約束勿得稍有疏懈致干咎戾此令

致北方各督撫及所轄各軍隊電 十二月二十六日

從前政體未定革命黨人爲改良政治起見多持激烈主義以致地方不靖各省官吏不免有捕拿黨人之事現已宣布共和端賴組織政黨建設一切嗣後各省及帶兵官務飭所屬勿得

十二月二十七日

再拿黨人其已拿者均須一律釋放至實係土匪擾害地方既不得藉黨人爲名自應從嚴懲治以維秩序全權袁

致北方各督撫各府州縣電 十二月二十六日

現在改定國體採用共和業經 大清皇帝明白宣布凡我國民須知此次改革爲我國從來未有之新局非舍故君而代以新君乃由帝政而變爲民政自茲以往我中國之統治權非復一姓所獨擅而爲四百兆人所公有我中華國民不論滿漢蒙回藏何種民族均由專制朝廷之臣僕一躍而爲共和平等之人民實我中華無上之光榮亦世界罕聞之盛舉惟當新陳代謝之交正禍福攸分之日始基不慎遺害何窮吾人同屬國民各有天職艱難締造義不容辭凱以非才謬膺組織臨時政府之任力小荷重其何能堪所賴我賢士大夫各竭知能共謀匡濟諸公久膺疆寄外觀世局內察民情必有以慰同胞望治之心方不負 大清皇帝致政之意其或愚氓無識胥動浮言亦宜剴切詳明廣爲勸導務令各安生業不釀事端是爲至要至地方有司在新官制未定以前一切暫仍舊貫所有各官署應行之公務應司之職掌以及公教公物均應賡續進行切實保管不可稍懈總之共和國家輿論卽爲法律之母國是一定萬難再事動搖無論何人均有服從國法之義務凱雖不敏願與諸公努力行之敬布腹心卽希亮察全權袁

致各督撫電 十二月二十六日

世凱臥病三年無志問世

朝旨敦促迭辭弗獲自督師泊入朝抱定君憲宗旨乃大勢推

遷內外牽逼東南區域既皆瓦解西北各省時復響應資政院及各諮議局並商學各界均主不以兵力平亂又庫儲奇絀借款爲難械不能購兵不能增以致漢口復而海軍繼變漢陽克而南京旋失江海之權亡財賦之源絕雖設法激勵將士取銷山東獨立規復山西省垣力保陝洛收撫大同一帶勉爲支撐北方賴以粗安而潮流劇烈到處灌輸民黨散布京津時謀舉動土匪又所在蜂起分兵布置防不勝防重以六國調停以尊重人道息戰和商爲請不得已始有代表討論之行繼有公決國體之詔磋商多日迄無成議遷延愈久險象環生外人以商務賠款時有責言會匪土匪焚掠淫殺均以大局未定難於剿辦近則庫倫伊犁呼倫各處紛告獨立西藏變動屢見內多糜爛之患外動干涉之機民軍時復分道北攻齊豫則警報頻來徐穎又援師莫繼兵餉多方湊發異常竭蹶年內非有百萬不克度歲而軍心搖動政見變遷若再相持轉瞬春融冰泮民軍北來欲戰不能欲和不及非但生靈塗炭必至京師震驚何以安

宮廷而保

陵廟何以全皇族而活旗民世凱遭此困難祈死不得求去不允與

惟德等私憂竊歎輒至相向泣下近者各國駐使各埠商團各處議會各路軍隊各省督撫紛紛來電咸謂人心趨向共和斷難逆遇事機危迫呼吸存亡與其爲城下盟後禍不堪設想何如恩出自上早日宣布共和俾君上不失尊榮國民樂爲酹報並責以不應以

兩宮及北

方生命財產爲孤注僥倖一戰不慮萬全

慈宮親貴鑒觀大勢默察輿情迭次召集會

十二月二十七日

議均主萬無可戰之理世凱等復屢荷

慈諭諄諄以保全

宗廟

陵寢及

安全

兩宮相訓勉並謂萬不可激成種族之慘禍聞命惴惴莫能副心力既竭計無復

懿旨與民軍先

之祇得以國家爲前提以安上全下爲目的以多數輿論爲從違當奉

商優禮皇室暨待遇滿蒙回藏等條件此實朝廷兩害取輕萬不得已之苦衷果能雙方同意和平解決皇室既可永享尊榮爲前代所未有而滿蒙回藏世爵各旗俸餉均可照舊不致停廢以視決裂之後受禍不測者其安危苦樂殆不同年而語磋商數四朝廷比較利害斟酌定議遂有今日之局諸公熱心求治偉略匡時渴望和平定徵同意惟於此中原委或尙恐未知其詳用敢略述奉達伏乞 亮鑒 袁世凱胡惟德趙秉鈞紹英唐景崇王士珍譚學衡沈家本熙彥梁士詒達壽同叩

照會

全權組織中華民國臨時政府首領袁 致各國公使照會

爲照會事所有本全權與民軍代表伍廷芳商議優待皇室各條件業已議定復奉茲將條件原文並本日所奉 大清皇帝諭旨鈔錄照會 貴大 臣 轉達 貴國政府查照須至照會者

外務部致各國公使照會

爲照會事宣統三年十二月二十五日奉

上諭朕欽奉

隆裕皇太后懿旨前因民

軍起事各省響應九夏沸騰生靈塗炭特命袁世凱遺員與民軍代表討論大局議開國會公決政體兩月以來尙無確當辦法南北睽隔彼此相持商輟於途士露於野徒以國體一日不決故民生一日不安今全國人民心理多傾向共和南中各省既倡議於前北方諸將亦主張於後人心所嚮天命可知予亦何忍因一姓之尊榮拂兆民之好惡是用外觀大勢內審輿情特率皇帝將統治權公諸全國定爲共和立憲國體近慰海內厭亂望治之心遠協古聖天下爲公之義袁世凱前經資政院選舉爲總理大臣當茲新舊代謝之際宜有南北統一之方卽由袁世凱以全權組織臨時共和政府與民軍協商統一辦法總期人民安堵海宇乂安仍合滿漢蒙回藏五族完全領土爲一大中華民國予與皇帝得以退處寬閑優游歲月長受國民之優禮親見郅治之告成豈不懿歟欽此相應恭錄照會 貴大 臣 轉達 貴國政府查照可也須至照會者

外務部致各國公使照會

十二月二十七日

爲照會事現在

大清皇帝業已

辛丑

由前內閣總理大臣袁世凱以全權組織中華民國

臨時政府茲奉袁全權命令將原有之各部大臣均暫留辦事改名各部首領所有中外交涉

事件仍由本部首領遵守各條約照舊繼續辦理一俟臨時政府成立再行知照相應照會

貴

署大臣

轉達

貴國政府查照可也須至照會者

外務部致各國使臣照會

爲照會事現在本國正在組織臨時共和政府所有現駐

貴國出使大臣暫改稱臨時外交

代表接續辦事除電知各該員外相應照會

貴

署大臣

轉達

貴國政府查照可也須至照

會者